

## Manifèsse pou 'ne Walonîye mèsse de s' culture, de s'n-inducâcion èyèt de s'n-èrcache

*Ô peûpe walon èyèt a sès r'présintants ô Parlèmint walon*

Il'-a vint-ans de d' ci, èl quinje de sètîmbe 1983, ô pus foûrt d' ène crîse ècologique èyèt sociale qui a manquî de nouyî èl Walonîye, quatre-vints citwayins walons signin'tè in *Manifèsse pou l' culture walone* ayu ç' qu' is rèclamin'tè l' èrcounchance de l' Walonîye come pèrsonalîte morale. Is-afirmîn'tè, ô dzeûr du markî : “ *Sont de Walonîye sans rastènanse tous lès cîns qui vîv'tè, travay'tè dins l' èspace walon.* ”

Ôdjordû, dès-ôtes Walons èyèt Walones, rabind'lès avû lès cîns qui ont signî l' Manifèsse, èrprèn'tè leû pleume pou lanci in fèl apèl a lès r'présintants ô Parlèmint walon.

### Ene miyète d' istwâre

Il-a sèptante-chonq ans de d' ci, Elie Baussart èscrevoût: “ *El Flande èyèt l' Walonîye n' sont nî fêtes pou l' Bèljique ; èl Bèljique èst fète pou l' Flande èyèt l' Walonîye* ”. C' èst su ç' principe la, pèrfond'mint démocratique qu' èrpoûse èl rèforme de l' Etat bèlje qui a 'stampè 'ne Comunôtè flamande èyèt 'ne Réjion walone. A costè de cès deûs rèyalîtès-la, il-ègzisse ètou ène Réjion brussèlwâse èyèt 'ne Comunôtè jèrmanofone. Eyèt ça ètou, ça rèspond al volontè dès peûpes.

Ene jènèrâcion pus târd, èl Walonîye s' a si fèl'mint rîforcéye qu' èle èst considèréye come yun dès rabind'lâdjes fèdèrès in-Eûrope èl pus asto de l' dèfinicion minme d' in-Etat mèsse de li.

Mès pou lès Walons (in dèwoûrs douci de l' Comunôtè jèrmanofone) èyèt pou lès Brussèlwas francofones, i dèmeûre ène twâsième intîte rèsponsâbe de l' inducâcion, d' ôkeunès matièrès sociales, dès médias publics èyèt de l' culture : èl Comunôtè francèse.

Dèspûs vint-ans, nos-avons yeû l' tamps de m'surér tout çu què ç' Comunôtè la - francèse de Bèljike - a fèt pièrde al Walonîye rapoûrt a s' seûle èyèt simpe èrcounchance umin.ne. Eç' minme Comunôtè francèse la qui, bî què manquant de liârdès èyèt avant d'vu pus d' in còup bibrè l' por-mounwaye de l' Walonîye èyèt lyi aband'nér d' ôkeunes de sès compètînces, continûwe a s' acrochî a çu qui li d'mèûre de pouwâr, in s' muchant padrî l' èscûse d' ène solidarîtè intrè Brussèle èyèt l' Walonîye. Ene solidarîtè qui pût s' fé valwâr in dèwoûrs de ç' n-institucion la.

### El Walonîye n' vût pus payî pou yèsse mise sul costè

El Gouvèrnèmint walon s' propoûse d' èrdrèssî l' Walonîye a t't-avô in *Contrat d' av'ni actualisè*. Çti-ci, s' i vût chèrvi a 'ne saquè, dèvra mobilisér l' èscolâdje, c' è-st-a dire èl djon.nèsse, de l' gardiène a l' universîtè. Sakants mèsses d' èscole pins'tè qu' i fôt réjionalisér l' èscolâdje pou parvèni, principal'mint, a mèyeû intèrlacî l' pur al'vâdje èyèt l' formâcion a l' ouvrâdje. Mès l' èscolâdje n' apartînt nî al compètence walone èyèt l' pouwâr politique walon dwat linsi s' alouyî, ô myeu, ô pouwâr politique

comunôtère. Abind'lâdje qui s' mousse yèsse in.ne inutile complicâcion èyèt in.ne intèrprîse bric-broc : èl Comunôtè, in-èfèt, n' èrcoûve nî<sup>n</sup> l' minme èspace politique qu' ène Walonîye d'ayeur lardjèmint mîse sul costè dins l' langâdje de l' èscolâdje comunôtère. Etou mîse sul costè dins l' libe chwas dès langâdjes ètranjers què lès Walons dwâv'tè mèstri. Eyèt mîse sul costè dins lès langâdjes de sès tèrwârs. Si cès-ci devin'tè disparète, ça s'roût 'ne fameûse pierte pou s' patrimwane culturèl.

*Donc, èl Walonîye paye, ô prope come ô figurè, pou què l' èscole francofone fèsisse come si èle n' ègzistoût nî<sup>n</sup> èyèt ça, èle nè din vût pus.*

Si branmint d' aspèrts sont d'acoûrd sul nécessité pou l' Walonîye de gangnî<sup>n</sup> ène forte imâdje, in r'vindje, dins l' câde del Comunôtè francèse, a stè lancî èl *Plan Magellan* ; çti-ci - qui s' propoûse de r'cintrér tout ou bî<sup>n</sup> a pô près tout su Brussèle - a stè condan.nè pa 'ne majorité du pèsonèl walon del RTBF. Nos l' savons bî<sup>n</sup> qu' a Brussèle, èl RTBF èrsint l' pus grande jène a prononcî lès mots Walon èyèt Walonîye.

*Donc, èl Walonîye paye, ô prope come ô figurè, pou què lès médias francofones fèsiss'tè come si èle n' ègzistoût nî<sup>n</sup>, èyèt ça, èle nè din vût pus.*

Din l' câde de l' Organisâcion intèrnacionale del Francophonîye, qui rabindèle ène cinquantène d' Etats, il-ègzisse dès rinscontes intèrnacionales. Après lès Francès èyèt lès Quèbèkwars, c' èst lès Walons, r'présintant 80% del Comunôtè francèse, qui asseûr'tè l' pus èl finanç'mint de cès rinscontes la. Pourtant, lès cî<sup>n</sup>s qui lès-i r'présint'tè l' font ô nom d' l' Etat bèlje ou bî<sup>n</sup> del Comunôtè francèse.

*Donc, èl Walonîye paye, ô prope come ô figurè, pou n' nî<sup>n</sup> yèsse présinte a cès grands foroms la què sont lès coupètes francofones èyèt ça, èle nè din vût pus.*

Din lès-afères sociales, co toudis del compètince del Comunôtè francèse, lès dificultès de liârd de çtèle-ci indjuquèl'tè, dins l' vîye de tous lès djoûs dès famîyes, ôssi bî<sup>n</sup> a Brussèle qu' in Walonîye dès fameûs manques come, par ègzimpe, dins l' domin.ne dès crêpes (1).

*Donc, èl Walonîye paye, ô prope come ô figurè, pou què lès Walons, èyèt pus spécial'mint lès fèmes, vway'tè leû 'spanissâdje impidjî pal minâbe ègzèrcice dès missions sociales rimplîyes pal Comunôtè èyèt ça, èle nè din vût pus.*

Infin, il-a èl sport ayu ç' què pus d' in sportif ou bî<sup>n</sup> d' ène sportîve du livô intèrnacional èrprésint'tè l' Walonîye. S' is-ont povu l' fé, principal'mint grâce a lès-èfoûrts dès pouvwârs publics walons, is n' sont què foûrt râlmint idintifiès come walons pa lès médias publics, mès seûl'mint rapoûrt a dès viles ou bî<sup>n</sup> dès vilâdjes.

*Donc, èl Walonîye paye, ô prope come ô figurè, pou qu' 'èspanisse in sport ayu ç' què lès-acteûrs walons nè sont nî<sup>n</sup> présintès come tèls èyèt ça, èle nè din vût pus.*

## El Walonîye vût èyèt pût ravoû lès compètinces qui li sont confisquéyes

On l' condan.ne a l' inègzistince culturèle èyèt l' Walonîye èl paye fôurt tchér'.

Pace què, pa d'zous l' couvèrte dèl Comunôtè francèse, dès nostalgiques dèl Bèljiqe unitère continûw'tè a volwâr "*fé du bèlje*" sans l' Flande.

Pace què, ètou, branmint dès Brussèlwas pins'tè qu' èl Comunôtè francèse soutînt l' louyure dè solidaritè intrè yeûs' èyèt lès Walons. I n' nos convînt nîn què ç' louyin la impîdje èl Walonîye dins 'ne posture dè dèspindance matèrièle èyèt morale a 'ne Vile qui s' vike toudis come capitale d' in-Etat unitère. Nos n' avons nîn dandjî dèl Comunôtè francèse pou garanti ç' louyin la dè solidaritè. Nos 'stons sésis dè vîr si souvint dès mimbes du Gouvèrnèmint brussèlwas ègzèrcî lès compètinces in matèriè d' ârts, dè lètes èyèt d' ôdiovisuwèl adon què ça n' èst jamés l' cas d' mimbes du Gouvèrnèmint walon : ène novèle preuve dèl volontè dè d' ôkuns d' èstoufi l' mwinsse rastokâdje culturèl dèl Walonîye. Nos 'rbârons ètou l' idéye qu' ont d' ôkuns d' organisér co in coûp in minme tamps èl vôtâdje fèdèral èyèt l' cîn du parlèmint walon.

Lès sinatères du présint Manifèsse ont l' sintimint dè d'visér pou l' peûpe walon. Is-èstim'tè *URGENT* qu' èl Walonîye rascoyisse lès compètinces in matèriè dè culture, d' èscolâdje d' èrcache fondamintale èyèt dè médias publics qui li z-ont stè confisquéyes.

Ôdjordû, contrér'mint al situwâcion d' il-a vint-ans dè d' ci, èl Walonîye dèstînt lès-ostis politiques èyèt juridiques pou asseûrer lèye-minme tous lès pouvwârs èyèt lès compètinces dèl Comunôtè francèse. Lès sinatères du présint manifèsse lanç'tè donc in-apèl a tous lès cîns qui r'présint'tè l' Walonîye.

## In.ne atinte qui pût yèsse satisfète éjîl'mint

Vos n' avèz nîn l' mwinsse kèrnate sul monde sans vo prope idintitè. L' Europe mèt in valicheûr l' unitè èyèt l' variètè, èl Francophonîye l' égalitè èyèt l' difèrince. El Walonîye, prodwît dè tous sès-imigrâcions, vût, lèye ètou, èl variètè, l' égalitè èyèt l' fraternitè.

Ele ratind dè sès r'présintants qu' is lyi doniss'tè l' possibilitè dè fé r'counwate ès' culture dins l' pèrfond sins' du mot, qui n' sè limite nîn a lès seûlès "*afères culturèles*", mès qui r'couvrise tout l' moncha dè l' ègzistince citwayène.

I s' adjit seûl'mint d' in p'tit boquèt d' èscrivâdje, d' in décrèt, qui don'roût ô peûpe walon lès compètinces in matèriè dè culture, d' èscolâdje, d' èrcache fondamintale èyèt dè médias publics qu' i n'a co toudis nîn. Bî'n seûr, èç' mèsure la n' èst nîn 'ne condicion sufisante dè l' ègzistince citwayène què nos volons, mès èle din-èst l' condicion nècèssère.

Què lès ciènes èyèt lès cîns qu' nos-avons éli doniss'tè donc èç' chance la al Walonîye dè djurvi a lès mouv'mints qui divîs'tè lès nâcions, lès peûpes, lès cultures, lès 'rlijions, lès filosofîyes èyèt lès-umins.

*(èç' tècse ci a stè 'scrit pa François André, Bernard De Commer, José Fontaine, Jean Louvet, Jean Pirotte èyèt Marie-Denise Zachary èyèt soumis a 'ne lardje consultâcion)*

Christian Quinet

(1) en français : crèche

Remarque hors texte : le participe passé des verbes conjugués avec l'auxiliaire avoir reste toujours invariable en wallon